

DIDZA' ZÍ'ALÖ GUSÖL-LÈ'È PABLO YÖDZÖ TESALÓNICA

Pablo rugapë' Dios bönachi queë' Cristo nacúa' Tesalónica

¹ Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queë'li', en gunë' ga soa dxi ícja ládxí'do'oli'.

Yugu' le taca bë' ta'yéajlë' bönachi Tesalónica Dios

² Rética'stu'-në' Dios: "Xclenu" cate' röjnetu' ca naca queë'li' yúgu'tëli'. Röjnética'stu' libí'ili', bi rinábitu'-në' Dios ni'a queë'li' cate' rulidztu'-në'. ³ Röjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácatíca'sili' tsutsu tu' runli' löza Xanru' Jesucristo. ⁴ Böchi' luzá'atu', Dios nadxí'inë' libí'ili', ate' nöztu' gurö cazë' Lë' libí'ili'. ⁵ Caní naca, tu' bidxín queë'li' didza' dxi'a runtu' libán que, calëga len dídza'sö, pero lësca' len yölla' huáca bidxín queë'li', ate' Dios Bö' Lá'ayi benë' tsutsu le, ate' idú ládxí'li' benli' löza le. Nöz quézili' ca gúcatu' ga zóali' tu' nadxí'itu' libí'ili'.

⁶ Libí'ili' butsó' cuinli', ate' runli' ca runtu' netu', enca' ca benë' Xanru', tu' guzxí' lu ná'ali' xtídzë'ë, ate' sal-la' gudí'i guzxáca'da'ali', budzëjali' tu' zóalenë' Dios Bö' Lá'ayi libí'ili'. ⁷ Caní naca, chinácali' tu le naca bë' lógaca yúgu'të bönachi

ta'yéajlë' Cristo nacua' luyú Macedonia, en luyú Acaya. ⁸ Caní naca, tu' guzë xtídzë'ë Xanru' ni'a queéli'. Calégasö luyú Macedonia, en luyú Acaya, pero lësca' yúgu'të lataj guzë didza' ca réajlë'ëli' Dios. Caní naca, bití' bi run bayudxi innatu', ⁹ tu' ta'guixjö' la' léguequisö bönachi ni' queétu' ca benli' netu' bal, en ca na' butsa' cuinli'. Bucá'anali' yugu' budó' guiöj budó' yaga, en böácali' queë' Dios para gunli' xichinë' Dios ban, Nu naca idú Dios. ¹⁰ Na'a, ribözali' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusölá rë'u lu dul-la', para cabí soa le gun ga ichúguië' Dios queëru' dza si' za'.

2

Xichinë' Dios benë' Pablo yödzö Tesalónica

¹ Böchi' luzá'atu', nöz quézili' bití' guca nítisö dxin queë' Dios bentu' cate' ni' bidxintu' ga zóali'. ² Nözili' ca guca queétu' lu yödzö Filipos, ca na' gudí'i guzxáca'tu', ate' guluá' dö' bönachi ni' queétu'. Ní'irö cate' bidxintu' ga zóali' gúcatu' rugu ladxi' tu' guzóalenë' Dios queëru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'. ³ Cate' ni' guchízatu' icja nágali' xtídzë'ë Dios, bë'ëtu' didza', calëga tu' nazí'i ye'e netu', en calëga tu' bi guzë ládxi'tu' le dë queéli', en bití' guzxí' yé'etu' libí'ili'. ⁴ Tu' nuzxöni ládxe'ë Dios netu', budödë' lu na'tu' guntu' libán que didza' dxi'a queë', ate' canísö ruí'itu' didza'. ⁵ Nöz quézili' catu' caz bë'lentu' libí'ili' didza' le gun zxön libí'ili', en bití' guléaj tsahui' cuintu' ca run nu bi rizë ladxi'

le dë queëli'. Nöz quezinë' Dios naca caní. ⁶ Biti' gudíljatu' yöl-la' ba le naca que yödzölió ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë lu na'tu' inná bé'etu' libí'ili' tu' nácatu' gubáz nasól-lë'ë Cristo ⁷ guzóalentu' libí'ili' dxi'i ládxi'do', en bentu' ca runnu xiná'agacabi' bi'i huë'ërido', run chí'inu lé'gacabi' dxi'i ládxi'do'. ⁸ Caní guca, bidxi'ide'etu' libí'ili', ga bidxintë gú'unitu' udöditu' lu ná'ali', calëgasö didza' dxi'a queë' Dios, pero lá'tu'biqui' udödi caztu' yöl-la' na'bán queëtu', tu' nadxí'ide'etu' libí'ili'. ⁹ Röjneli', böchi' luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zi'i, ate' rëla, en të dza bentu' dxin para cabí usaca' zí'itu' nituli' libí'ili'.

¹⁰ Libí'ili' na' réajlë'ëli' Cristo, huáca gunli' ba nalí, ate' nözinë' Dios ca na' gudá'entu' libí'ili' idú ca raza ládxi'ë Dios, en idú dxí'ado', en ca na' cuntu nu gaca bi innë que. ¹¹ Lë'sca' caní nözili' ca bentu' ca runë' tu bönni' quégacabi' zxi'inë', guchízatu' icja nágali', en butípatu' ládxi'li' tu tuli'. ¹² Busá'atu' ládxi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení' queë'.

¹³ Que lë ni na' ca', rëtica'stu'-në' Dios: "Xclenu'." Caní runtu' tu' guzxi' lu ná'ali' xtídzë'ë Dios le biyónili' bë'ëtu' didza', calëga ca xtídza' bönáchisö, pero ca le nácatë naca, xtídzë'ë Dios naca. Xtídzë'ë na' run dxin lu icja ládxi'do'oli' libí'ili', réajlë'ëli' Cristo. ¹⁴ Böchi' luzá'atu', raca queëli' ca raca quégaca bönachi queë' Dios, nupa néquiguequi queë' Jesucristo luyú Judea. Caní naca tu' chigudí'i guzáca'da'ali' lu ná'agaca bönachi

uládz queëli', lëbisö ca na' gula'guí'i gula'záquië légaquië' lu ná'agaca bönachi uládz quegaquië', nupa ni' náagaca bönni' judío. ¹⁵ Yugu' bönni' judío na' gulútië' Xanru' Jesús, en gulútië' ca' yugu' bönni' gulu'ë didza' uláz queë' Dios. Gula'bía ládxi'gaquië', en bulu'láguë' ca' netu'. Biti' tunë' le raza ládxi'ë Dios, tu' cabí ta'lé'enë' dxi'a yúgu'të bönachi izá'a. ¹⁶ Tu'záguë'ë ca' xinöztu', para cabí guntu' libán lógaca bönachi izá'a na' bití nabábagaca légaquië', tu' ru'ilentu' léguequi didza' para ulu'lágaca. Caní raza, tu'zántica'së' dul-la' nabága'gaquië', en chinabága'gaquië' xíguia' le run ga ichúguië' Dios quegaquië'.

Pablo rë'enë' tsöjyüë' böchi'ru' nacu'ë Tesalónica

¹⁷ Na'a, böchi' luzá'atu', ruhu'initu' ca runë' tu bönni' uzëbi tu' nulá'alentu' libí'ili' tu chí'ido', pero sal-la' bití' rilé'etu' libí'ili', bití' nál-la ládxi'tu' libí'ili'. Que lë ni na', ru'i ládxi'rötu' ulé'etu' loli', tu' rizëda' ládxi'tu' guntu' caní. ¹⁸ Que lë ni na' ca' gú'unitu' guídatu' ga zóali', ate' neda', Pablo, le nácatë bë' ládxa'a guída' chopa tsonna luzuí, pero Satanás, tu' xihui', buzaga' xinöztu'. ¹⁹ ¿Bizxi caz naca le run ga runtu' löza, o le run ga rudzëjatu', o le ral-la' idéli'tu', le uzí'itu' xibé lahuë' Xanru' Jesucristo cate' huödë'? ¿Naru' cabí libí'i cázali' na'? ²⁰ Libí'i cázali' nácali' le run ga nácatu' bica' ba, en le run ga rudzëjatu'.

3

¹ Que lë ni na', cate' bítí'rö guca guá' ilentu', ben xtídza'tu' ugá'anatu' chópatu' lu yödzö Atenas, ² ate' gusöl-la'tu'-bi' bi'i böchi'ru', Timoteo ga zóali'.

Nácabi' bi'i huen dxin queë' Dios, en rúnlenbi' neda' tsözxön libán que didza' dxi'a queë' Cristo. Gusöl-la'tu'-bi' ga zóali' para cuéquibi' libí'ili' tsutsu, en ichízabi' icja nágali' ca ral-la' tséajlë'ëli' Cristo, ³ para cabí soa nu gaca chopa ladxi' ní'a que le tu'saca' zi' bönachi ni netu'. Nöz quézili' zóaru' yödzölió ni para guá' ilenru' le caní. ⁴ Lësca' cate' ni' guzóalentu' libí'ili', busiyöntu' libí'ili' ca chizóa gaca le ulu'saca' zi' rë'u, le gaca ca na' chiguca queétu', ate' nöz quézili' lë na'. ⁵ Que lë ni na', cate' bitirö guca guá' ilena', gusöl-la'a-bi' bi'i Timoteo ga zóali', para ududíxjöi'ibi' neda' ca naca queëli' ca réajlë'ëli'-në' Cristo, en channö cabí gulú'u tu' xihui' libí'ili' nöza dul-la', nu na' rigú'u bönachi nöza dul-la', en channö cabí böáca nítisö dxin na' bentu' ga zóali'.

⁶ Cate' buzá'abi' bi'i Timoteo ga zóali', en budx-inbi' ga zóatu', busiyönbi' netu' le naca dxi'a. Bë'ëbi' didza' ca na' réajlë'ëli' Cristo, en ca na' nadxí'igacali'-në' yugu' böchi' luzá'aru', en ca na', lu yöl-la' dxi'i ladxi' queëli' röjnética'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' libí'ili'. ⁷ Que lë ni na', böchi' luzá'atu', cate' ni' gudí'i guzxáca'tu' yúgu'të lë ni, en zían le guca queétu', bidxín didza' queétu' le buí'i zxön netu' cate' biyönitu' ca réajlë'ëli'-në' Cristo. ⁸ Na'a, nuhuóáca ládxi'tu' tu' riyönitu' rő'öli' tsutsu ca réajlë'ëli'-në' Xanru'. ⁹ ¿Nacxi caz gaca guíëtu'-në' Dios: "Xclenu" ca ral-la' guntu' ní'a que yúgu'të le run ga rudzeja ládxi'tu' lahuë' Dios queëru' ní'a que le nácali' libí'ili'? ¹⁰ Bayudxi rulidztu'-në' Dios, en rinábitu'-në' rëla, en të dza para gaca ulé'etu' libí'ili', en usá'atu' le riyadzaj queëli' ca naca le réajlë'ëli'-në' Cristo.

11 Na'a rinábitu'-në' Xúziru' Dios, enca' Xanru' Jesucristo, cu'ë netu' nöza ga idxintu' ga zóali'.
 12 Lësca' rinábitu'-në' Xanru' gunë' ga gala, en gaca idú ca nadxí'ili' luzá'ali' tuli' ia'tuli', en ca nadxí'ili' yúgu'të bönachi, ca na' netu' nadxí'itu' ca' libí'ili'.
 13 Rinábitu'-në' gunë' ga gaca tsutsu, en idú dxi'a icja ládxi'do'oli' lahuë' Xúziru' Dios ca sa'yéaj le naca lá'ayi, ate' gunë' caní ga idxinrö dza huödë' Xanru' Jesucristo, dzágagaca bönachi lá'ayi queë' Lë'.

4

Le runru' le raza ládxe'ë Dios

1 Ia'stú, böchi' luzá'atu', ni'a queë' Xanru' Jesús ráta'yutu' loli', en richízatu' icja nágali' para gunli' ca naca le chinazédali' lu na'tu' ca ral-la' gunli' le raza ládxe'ë Dios. Ca na' chirunli', ca' ral-la' gúntica'sili'.

2 Chinöz quézili' yugu' le gunná bé'etu' libí'ili' uláz queë' Xanru' Jesús. 3 Le rë'ënë' Dios naca gácali' idú dxi'a, en bítirö gunli' le cabí naca tsahui', 4 en inözili' tu tuli' nacxi ral-la' sóalenli'-nu nigula que queéli' idú ca sa'yéaj le naca lá'ayi, en gunli' légacanu bal. 5 Biti' ral-la' sóalenli'-nu nigula queéli' lu yöl-la' rizë ladxi' le ruá' dö', ca na' tun bönachi bití nabábagaca Dios, en bití núnbë'gaca Dios. 6 Ca nácagaca lë ni, cuntu nu ral-la' tódi bë', en cabí si' ye'e böchi' luzë'e bagáchi'sö, tu' ichúguië' Lë cazë' Xanru' quégaca yúgu'të nupa tun le caní, gunë' ca na' chigúdxitu' libí'ili', en bentu' ba nalí que loli'. 7 Dios bulidzë' rë'u, calëga para gunru' le ruá' dö', pero para gácaru' idú dxi'a. 8 Caní naca, nu ruzóa tsölá'alö lë ni, calëga bönáchisö ruzóa

tsölá'alö, pero Dios caz ruzóa tsölá'alö, tu' gusöl-lë'ë Lë cazë' Dios Bö' Lá'ayi queëru', Nu ruí'í caní didza'.

⁹ Biti' run bayudxi uzúaja' queëli' lu guichi ca ral-la' idxí'igacali'-në' böchi' luzá'ali', tu' chinzédali' la' libí'isili' lu në'ë Dios idxí'ili' luzá'ali' tuli' ia'tuli'. ¹⁰ Le nácatë nadxí'igacali'-në' yúgu'të böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacaröli'-në' ca' yúgu'të böchi' luzá'ali'. ¹¹ Ráta'yutu' loli' ca', güi'í ládxi'li' cözali' dxí'ado', en gunli' yugu' le dë lu ná'asili', en gunli' dxin len na'a cuinli' ca na' chigunná bé'etu' libí'ili'. ¹² Gunná bé'etu' libí'ili' caní para gaca gunli' le naca dxí'ado' lógaca nupa bití' nabábagaca libí'ili', en caní gaca, bití' bi yadzaj queëli'.

Ca gaca cate' huödë' Xanru' Jesucristo

¹³ Lësca', böchi' luzá'atu', rë'ënitü' inözili' ca raca quégaca nupa chinátigaca, para cabí hu'ínili' ca tun ia'zica'rö bönachi bití' zoa le tun löza. ¹⁴ Channö réajlë'ëru' gútië' Jesús, en bubanë', lësca' caní ralla' uzxöni ládxi'ru'-në' Dios gunë' ga huödallengaca tsözxön Jesús nupa ni' chigulati, en gula'yéajlë' Lë'.

¹⁵ Que lë ni na' riguíxjöi'itu' libí'ili' xtídzë'ë Xanru' le rnna caní: “Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, bití' tsöjtságaru'-në' Cristo zí'alö ca nupa chigulati.” ¹⁶ Caní gaca, tu' huötjë' Lë cazë' Xanru', en irúajë' yehua' yubá, ate' yön chi'ë, len yöl-la' unná bë' ulidzë', ate' yön ca' chi'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo. ¹⁷ Ní'irö rë'u ni zóaru' nabanru', en nagá'anaru' luyú ni,

uchisë' rë'u tsözxön len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóaléntica'siru'-në' Xanru'. ¹⁸ Que lë ni na', guli'huí' zxön luzá'ali' tuli' ia'tuli' ca nácgaca didza' ni.

5

¹ Na'a, ca naca dza na', o rëla na' cate' ilaca lë ni, biti' run bayudxi uzúaja' queéli' lu guichi, böchi' luzá'atu'. ² Libí'ili' chinöz quézili' dxi'a ca gaca dza cate' huödë' Xanru'. Idxinë' tsárido'os ca ridxinë' gubán chi'i dzö'ölö. ³ Cate' ila'nná bönachi: "Raca dxi'a queëru', en biti' bi gaca queëru'", ní'irö la' idxintë le usuniti léguequi, lë na' idxín quéguequi ca na' ridxín le riguí'i rizáca'nu nigula na' chizóa sóabi' bí'ido' queënu, ate' cuntu nu nutsa' ladaj bönachi yödzölió ni nu ulá cate' gaca lë na' gaca dza na'. ⁴ Na'a, böchi' luzá'atu', biti' zóali' chul-la niti, en que lë ni na' biti' idxín dza ni' queéli' bagáchi'só ca ridxinë' bönni' gubán. ⁵ Yúgu'tëli' nácali' bönachi que bení', en que lahui' dza. Biti' nácaru' bönachi que chi'i dzö'ölö, en calëga que le naca chul-la. ⁶ Que lë ni na', biti' ral-la' tödi yëla loru' ca raca quégaca nupa biti' nabábagaca rë'u, pero ral-la' usubán ládxi'ru', en cózaru' ba'a ládxi'do'. ⁷ Nupa tasi, chi'i dzö'ölö tasi, en nupa ta'zudxi, chi'i dzö'ölö ca' ta'zudxi. ⁸ Na'a, rë'u ni, nácaru' que lahui' dza, en ral-la' cózaru' ba'a ládxi'do', tu' chinácuru' zxaru' le run chi'i rë'u, le naca yöl-la' réajlë' queëru' Dios, en yöl-la' nadxí'i, ate' le runru' löza uláru' naca ca tu lu'u guíë le run chi'i ícjaru'. ⁹ Caní naca, tu' nuzóë' Dios rë'u ni, calëga para idxinru' ga ichúguië' queëru', pero para uláru' tu' ruzxöni ládxi'ru'-në' Xanru' Jesucristo, ¹⁰ tu' gútië'

Jesús uláz queeru' para sóaru' ibanru' tsözxön len Lë' cate' huödë', sal-la' chinátiru' o sóaru' ibanru' dza ni'. ¹¹ Que lë ni na' ral-la' utípali' ládxi'li' tuli' ia'tuli', en gunli' tsutsu tuli' ia'tuli' ca na' chirunli'.

Pablo richízië' icja nágagaquië' böchi' luzë'ë ta'yéajlë'ë Cristo

¹² Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá' ládxi'li'.

¹³ Ráta'yutu' loli' ca', gunli' légaquië' bal lu yöl-la' nadxi' queëli', tu' tunë' dxin na'. Guli'cöza dxí'ado' tuli' len ia'tuli'.

¹⁴ Lësca' caní richízatu' icja nágali', böchi' luzá'atu', para usá'ali' ládxi'gaca nupa biti' túngaca dxin, en utípali' ládxi'gaca nupa tu'huöaj ládxi'guequi, en gácalenli' nupa biti' naca tsutsu ca ta'yéajlë' Cristo, en gácali' nöxaj ladxi' lógaca yúgu'të bönachi.

¹⁵ Guli'gún chi'i cuinli' para cabí uzí' lëbi luzá'ali', en cabí guá'ali' dö' que nu ruá' dö' queëli', pero guli'güí' ládxi'li' gúntica'sili' le naca dxí'a que luzá'ali' tuli' ia'tuli', en quégaca yúgu'të bönachi.

¹⁶ Buli'dzéjatica'sö,

¹⁷ en buli'lídzatica'së' Dios,

¹⁸ en guli'guíë' Lë': "Xclenu'."

Caní ral-la' gunli' ni'a que yúgu'të le raca queëli', tu' nácagaca lë ni le rë'ënë' Dios gunli' tu' nácali' queë' Jesucristo.

¹⁹ Biti' uzóa dxili' le rulídzatica'së' Dios Bö' Lá'ayi libí'ili'.

²⁰ Biti' uzóali' tsólá'alö xtídzë'ë bönni' ru'ë didza' uláz queë' Dios.

21 Guli'sí' bē' yúgu'tē, en guli'sí' lu ná'ali' le naca dxi'a.

22 Biti' bi gútsa'li' le ruá' dö.

23 Lē cazē' Dios, Nu run ga zoa dxi icja ládxi'do'oru', gunē' ga gácali' idú dxi'a, en gun chi'ē bö' naca cázali', en icja ládxi'do'oli', en idútē le nácali', ate' cuntu nu gaca bi innē queēli' dza ni' huödē' Xanru' Jesucristo. 24 Runē' Dios ca rnnē', Bönni' na' bulidzē' libí'ili'. Lē cazē' gunē' yugu' lē ni.

Pablo rigu'ë yugu' böchi' luzë'ë lu nē'ë Dios

25 Böchi' luzá'atu', buli'lidzē' Dios, en inábili'-nē' gácalenē' netu'.

26 Buli'gapa Dios yúgu'tē böchi' luzá'aru', en unída'li' légaquiē' lu yöl-la' nadxí'i queēli'.

27 Ni'a queē' Xanru' Dios ruchi'a libí'ili' ulábali' guichi ni lógaca yúgu'tē böchi' luzá'aru' nabábagaquiē' Cristo.

28 Rinábida'-nē' Xanru' Jesucristo uzá' ládxe'ë queēli' le nácagaca dxi'a queē'. ¡Ca' gaca!

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

58bf86df-ae22-508c-81dc-936dbf138c25